



INSTITUCIONET E PËRKOHSHME VETËQEVERISËSE
PROVISIONAL INSTITUTIONS OF SELF-GOVERNMENT
PRIVREMENE INSTITUCIJE SAMOUPRAVLJANJA

QEVERIA E KOSOVËS – GOVERNMENT OF KOSOVO – VLADA KOSOVA

MINISTRIA E MJEDISIT DHE
PLANIFIKIMIT HAPËSINOR

MINISTRY OF ENVIRONMENT
AND SPATIAL PLANNING

MINISTARSTVO SREDINE I
PROSTORNOG PLANIRANJA

**VENDIM ADMINISTRATIV
NR. Rend 24 – Prot. 21/03**

**MBI ZBATIMIN E LIGJIT PËR PLANIFIKIMIN HAPËSINOR MBI THEMELIMIN
E INSTITUTIT PËR PLANIFIKIM HAPËSINOR**

Ministri e Mjedisit dhe Planifikimit Hapësinor:

- Në pajtim me autorizimet sipas nenit 5 paragrafi 5.2 dhe 5.3 dhe të nenit 11, paragrafi 11.1 të Ligjit për planifikimin hapësinor, nr. 2003/14 të datës 03. 07. 2003, nënshkruar nga PSSP me Rreguloren për shpalljen e Ligjit për planifikimin hapësinor, të miratuar nga Kuvendi i Kosovës, nr. 2003/30 të datës 10. 09. 2003, si dhe nenit 1 paragrafi 1.3 (ç) të Rregullores mbi Degën e Ekzekutivit Nr. 19/2001 të datës 13 shtator 2001 dhe Rregullores nr. 5/2002, të datës 4 mars 2002 mbi ndryshimin e Rregullores së UNMIK-ut mbi Ekzekutivin e Institucioneve të Përkohshme të Vetëqeverisjes;
- Për shkak të nevojës së paraqitur e me qëllim të përgatitjes, koordinimit dhe hartimit, përcjelljes së zbatimit të Planit Hapësinor të Kosovës dhe përmirësimit të kushteve për kryerjen e punëve profesionale në fushën e planifikimit hapësinor dhe urbanistik, organizimit në ofrimin e shërbimeve në këtë fushë, si dhe realizimit të qëllimeve të tjera të Ministrisë;

Nxjerr këtë Vendim Administrativ:

**Neni 1
Themelimi**

1.1. THEMELOHET Instituti për Planifikim Hapësinor (më tej: Instituti), si njësi e veçantë organizative e Ministrisë së Mjedisit dhe Planifikimit Hapësinor (më tej: Ministria), për përgatitjen e Planit Hapësinor të Kosovës dhe kryerjen e punëve të tjera profesionale për të cilat autorizohet me këtë Vendim Administrativ.

1.2. Instituti fillon punën 60 ditë pas hyrjes në fuqi të këtij Vendimi Administrativ.

Neni 2

Autorizimet e tjera të Institutit

Në pajtim me Ligjin për planifikimin hapësinor, Instituti do t'i kryejë edhe këto punë profesionale, në fushën e planifikimit hapësinor dhe urbanistik:

- Harton planet hapësinore për zona të veçanta dhe dokumentet relevante planifikuese dhe të raporteve;
- Mbledh dhe studion përvojat dhe të arriturat në lëmin e planifikimit hapësinor dhe urbanistik dhe kështu t'i kontribuojë zgjidhjes dhe përparimit të tyre në praktikë;
- Koordinon dhe monitoron punën e agjencive të tjera dhe të ekspertëve të tjerë për kryerjen e detyrave të veçanta të Planit Hapësinor të Kosovës dhe të planeve për zonat e veçanta për të cilat ngarkohen ato;
- Koordinon punën e Institutit me departamentet dhe njësitë e tjera organizative të Ministrisë për punët në fushëveprimin e Institutit;
- Ofron këshilla dhe asistencë për komunat në hartimin e planeve hapësinore dhe urbanistike;
- Ofron ndihmë profesionale në inkurajimin dhe sigurimin e pjesëmarrjes së publikut në proceset vendimmarrëse planifikuese;
- Krijon, menaxhon dhe mirëmban bazën e të dhënave dhe të shënimeve të planifikimit hapësinor për Kosovën dhe ua bënë të mundur institucioneve të interesuara shfrytëzimin e tyre;
- Kryen punët e tjera të caktuara me Ligj dhe dispozitat e miratuara në bazë të ligjit dhe punët e tjera profesionale që ia beson Ministri.

Neni 3

Udhëheqja me Institutin

3.1. Me Institutin udhëheq Drejtori i Institutit, i cili caktohet në pajtim me aktet përkatëse juridike mbi Shërbimin Civil të Kosovës.

3.2. Drejtori i Institutit për punën e tij mban përgjegjësi direkte ndaj Sekretarit Permanent të Ministrisë.

3.4. Drejtori i Institutit është përgjegjës për menaxhimin e gjithëmbarshtëm të Institutit dhe për sigurimin e zbatimit të përgjegjësive që i janë bartë Institutit, si dhe menaxhimin efektiv dhe efikas të resurseve të Institutit.

3.5. Deri në emërimin e drejtorit të Institutit, ushtrues i përkohshëm i detyrës së drejtorit të Institutit e cakton sekretari permanent në marrëveshje me Ministrin, i cili i ndihmon sekretarit permanent të Ministrisë, në përgatitjet për organizimin, sistemimin dhe të çështjeve e tjera për fillimin e punës së Institutit.

Neni 4

Organizimi, mjetet dhe punësimi

4.1. Ditën e fillimit të zbatimit të këtij Vendimi Administrativ, punëtorët e punësuar (sipas konkursit të Ministrisë të datës 3.05.2003 në Departamentin për Planifikim Hapësinor të Ministrisë, të cilët janë aftësuar dhe kanë kryer disa punë profesionale nga neni 2 i këtij Vendimi Administrativ, kalojnë në Institut, së bashku me pajisjet dhe dokumentacionin.

4.2 Sekretari permanent i Ministrisë ka për detyrë që organizimin, mjetet financiare dhe punësimin e personelit tjetër të ri në Institut, sipas këtij Vendimi Administrativ dhe në pajtim me aktet juridike normative të Shërbimit Civil të Kosovës, t'i rregullojë dhe harmonizojë në afat prej 60 ditësh, nga dita e hyrjes në fuqi të këtij Vendimi Administrativ.

Neni 5
Hyrja në fuqi

Ky Vendim Administrativ hyn në fuqi ditën e nënshkrimit nga ana e Ministrit.

Ministri i Mjedisit dhe Planifikimit Hapësinor

Z. Ethem Çeku

Prishtina
3.10.2003